

In amatlahcuilol tlen oquimihcuiluilihqueh in tlaniltocanih

Hebreos

Dios techonnotza ica niConetzin

1 Ya uehcau, Dios micpa uan tlatlamantli oquinnotz in toyauehcautahuan ica nintlahtol in teotlanauatanih.

2 Pero axan, itich niyacatlamilis in tonalmeh, Dios techonnotza ica niConetzin, naquin ocaxcatih nochi, uan naquin ica Yehuatzin oquichiu nochi tlen cah.

3 Itich Yehuatzin niConetzin mo-nextia quen tlailiuis mouistica-tzintli Dios, uan itich monextia yec quen ameh Dios. Uan nochi tlen cah, niConetzin icchicautoc ica in chicalis tlen icpia nitlahtoltzin. [Ica nimiquilitzin] otechonchipau den totlahtlacol, uan omotlahit-zinoh iyecmapantzinco in Dios Ueyihcatzintli ompa iluicac cam-pa motlanauatilia Dios.

Jesucristo ocachi ueyihcatzintli uan amo in iluicactlatitlanten

4 Uan ohcon niConetzin ocachi tlapanauihtoc uan amo in iluicactlatitlanten, nic ocaxcatihqueh se

toocatl tlen ocachi tlapanauihtoc uan amo yehuan.

5 Pues Dios amo queman oquiluih se iluicactlatitlantli:

Touatzin tonnoconeu,
neh axan inmitzontiquiuahca-
tlalia.^a

Dion amo queman oquihtoh de se iluicactlatitlantli:

Neh nisqui nipapan,
uan yeh isqui noconeu.^b

6 Uan noiuqui ihcuac Dios ocon-teixmatiltih nisintiConetzin nican talticpac, ocmihtaluih:

Ixtlacachiuacan Yehuatzin,
nochtin iluicactlatitlanca-
uan Dios.

7 Uan den iluicactlatitlanten ihquin ictoua:

Yehuatzin quinchia niiluicac-
tlatitlancauan quemeh in
ehecatl,
nitiquitcauan quinchia queh
tlitl tlen mocuicuitoc.^c

8 Pero de niConetzin conmihtal-
uia:

Tonmotlanauatilia, Tehuatzin
Dios, ica in sintitl nochipa;

^a Sal. 2:7 ^b 2 S. 7:14; 1 Cr. 17:13 ^c Sal. 104:4

campa Tehuatzin tonmotlanauatilia cah yec tlanauatilis.

⁹ Itcontlasohtla in yecchiualistli uan itconcochia in tlen amo cuali chualis, ica non Dios, naquin moDios, omitzonpihpin tonueyitiquiahtlayacanqui uan moyolo contemitia ica paquilis ocachi uan amo nocsiquin naquin mouantzin cateh.^d

¹⁰ Noiuqui conmihtalua: Tehuatzin toTecotzin, ipeuyan nochí, otcomochiuihltzinoh in tlalticpactli, uan in iluicac ica momatzitzin otcomochiuihltzinoh.

¹¹ Nochi nin yacatlamis, masqui ohcon, Tehuatzin nochipa tonmetztias. Nochi non ihsoliutas quemeh se tlaquemtl.

¹² Uan itcontotonos quemeh se tlaquemtl, uan itquimonpatlas. Masqui ohcon Tehuatzin ayic mopatla mochiualitzin, uan moyolilitzin ayic yacatlamis.^e

¹³ Dios amo queman oquiluih se iluicactlatitlantli: Xonmotlalihtzino noyecmapan, uan inquntlalis itlampa mocxitzitzin aqihqueh mitzoncocoliah.^f

¹⁴ Pues tlamilauca, nochtin in iluicactlatitlanten yeh espíritus itla-

matlancauan Dios, tlatitlanten maquinmatlanican naquin imaxcatis in temaquixtilis.

Amo matsicantlalian in temaquixtilistli

2 Ica non moniqui ocachi matmotemacacan inauac in tlah-tol tlen cualica temaquixtilistli tlen yotcaqueh, amo yeh itpolouah in ohtli.

² Pues tla in tlanauatil tlen in iluicactlatitlanten otechmatilticoh itquitah simi chicaliseh nitlahtol, nic nochí naquin ocshisimat uan amo octlacamat ocshilih tlatzacuilitil ohcon quen icnamiqui,

³ ¿tehuan quenih itcholouilisqueh in tlatzacuilitil tlaqueh san itsihsimatih nin ueyi temaquixtilis? Pues nin temaquixtilis octematiltih achtoh yen toTecotzin, uan satepan otechmatiltihqueh naquin innoh-mah occaqueh de Yehuatzin.

⁴ Sannoiuqui Dios sansican inuan noiuqui yeh otechmatiltih ica nescayomeh, tetzauimeh, ica miqueh iluicacchiualisten, uan ica in Espíritu Santo tlen contemactia tlatlamantli uililistli ohcon quemeh Yehuatzin nitlaniquilitzin.

Cristo omochiutzinoco tlalticpactlacatl uan ohcon otechonmaquixtih

⁵ Dios amo oquintlalih yen iluicactlatitlanten matlanauatican itich in tlalticpac tlen satepan isqui, de tlen axan ittlahtohtoqueh.

^d Sal. 45:6-7 ^e Sal. 102:25-27 ^f Sal. 110:1

⁶Tla yeh, canah itich in Teotlahtolamatl acah oquihtoh:

¿Tlenoh in talticpactlacatl,
tleca itconilnamiqui,
uan tlenoh niconeu in tlatatl,
tleca tonmomohsiuihtzinoua
ipampa?

⁷Otcontlalih tipitzin mai ocachi
tzohtzocotzin uan amo in
iluicactlatitlanten,
otconmomactilih uehcapan
toocaatl uan tetlacachiuahis,
uan otcomocauililih quemeh
teteco itich nochi motla-
chialitzin,

⁸uan imac otcomocauilih
nochi.

Uan tla Dios oconmactih nochi
imac, ictosniqui amo omocau
itlah tlen amo ocmactihqueh. Mas-
qui axan ayamo itquitah nochi ya
icpixtoc imac.^g

⁹Pero itquitah Jesús, naquin Dios
ocontlalih tipitzin mai ocachi
tzohtzocotzin uan amo in iluicac-
tlatitlanten, axan icpia uehcapan
toocaatl uan tetlacachiuahis nic
otlahyouih itich in miquilis. Dios
ica nitetlasohitalitzin tlen otech-
onpialih, ocomoniquiltih Jesús
mamomiquilihtzino ipampa it-
nochtinten.

¹⁰Tlamilauca, ohcon omonic
macmochiuilihtzino Dios, naquin
oconchiu nochi tlen cah, uan
naquin conchicautoc nochi.
Omonic iccauas matlahyoui Jesús,
para ohcon oixpiltantah omochiu-
tzinoh se mahsic cuali tlayacan-

qui naquin uilis techmactis in
temaquixtilistli. Pues Dios ocom-
oniquiltihzinoh quinuicas miqueh
ipiluantzitzin itich nimouistica-
chantzin.

¹¹Pues naquin techonsicantlalia
den tlahtlacol uan tehuan naquin
ya ittlasticantlalilten, san se to-
papan itpiah. Ica non Jesús amo
pinaua technotzas ticniuán,

¹²uan conmihtaluia itich in Teo-
tlahtolamatl:

Intenonotzas mochiualitzin in-
nauac nochi nocniuán,
uan inmitzmotlaca-
chiuilihtzinos campa
nichicautoqueh mitzmo-
tlacachiuihltoqueh.^h

¹³Uan noiqui quihtoua:

Neh inmoyolchicauas inauac-
tzinco Dios.ⁱ

Uan teuan ictoua:

Nican nichah, inuan coconeh
tlen Dios onechinmactih.^j

¹⁴Ica non, ohcon quemeh nin-
queh coconeh icpiah intlalnaca-
yo uan imeso, Jesús sannoiuqui
omochiutzinoh talticpactlacatl
uan oquipix itlalnacayo uan ieso,
para ohcon ica nimiquililtzin, Jesús
oquitlan naquin ocpiaya in chica-
ualis itich in miquilis, yen amo-
cuali.

¹⁵Uan ohcon yoquintohton noch-
tin naquin itich nochi ninyolilis
ocatcah temac nic ocmouilayah in
miquilis.

¹⁶Tlamilauca, Yehuatzin amo
oquinpaleuco yen iluicactlatitlan-

^g Sal. 8:4-6 ^h Sal. 22:22 ⁱ Is. 8:17 ^j Is. 8:18

ten, tla yeh oquinpaleuico naquin ualeuah inauac Abraham.

¹⁷Ica non omonic itich nochi mai ameh queh nicnluan, para ohcon uilis isqui se ueyiteopixcatlayacanqui teicnoitani uan tlatlacamatini inauactzinco Dios, uan ohcon uilis quintlahtlacolchipauas in taltic-pactlacameh.

¹⁸Pues Yehuatzin inohmah otlapanoc ihcuac in tlahtlacol oquinic icyoltilanas, ica non axan Yehuatzin chicaucatzintli uan ohcon uili quinmatlani naquin in tlahtlacol icniqui quin-yoltilanas.

**Jesucristo ocachi ueyihcatzintli
uan amo in Moisés**

3 Ica non, nocnluan iaxca-uan Dios, namehuantzitzin naquin Yehuatzin onamechon-notz xonpouican iuantzin ompa iluicac, ixcontlalican namotlachialis inauactzinco Cristo Jesús, naquin Dios ocualtitlan tonauac quemeh ueyiteopixcatlayacanqui den tlaniltoquilis tlen itpiah.

²Jesús otlatlacamat itich nochi tlen ocmoluilih Yehuatzin naquin ocontlalih itich non tiquitl, sannoiuqui quemeh Moisés otlatlacamat itich nochi tlen Yehuatzin oquiluih macchiua innauac nochi in chayotl Israel.

³Pero Jesús icnamiqui uehcapan-tlalilis ocachi uan amo Moisés, ohcon queh in calchiuani ocachi icnamiqui uehcapan-tlalilis uan amo in cali.

⁴Se cali uilica acah icchiua. Pero naquin ocmochiuilih nochi tlen cah yeh yen Dios.

⁵Moisés tlamilauca otlatlacamat quemeh itiquitcau Dios itich nochi tlen Dios octiquitih macchiua itich in chayotl Israel, uan nitiquiu se tlanihniuiltil de tlen Yehuatzin satepan ocontematiltisquia.

⁶Pero Cristo yeh otlatlacamat queh teconeu itich yehua nichan. Uan non chayotl yeh yen tehuan, tla queh milauac [hasta in toyacatlamilis] amo itcauah itmoyolchicauah uan itpaquih ica tlen itchiah.

**Niconeuan Dios moseuiah
inauactzinco**

⁷Ica non, ohcon quen ictoua in Espíritu Santo itich in Teotlahtl-amatl:

Tla axan nanconcaquih ni-tlahtoltzin Dios,

⁸amo ixconchicauacan namoyolo quemeh naquin onechixnamiqueh,

itich necah tonal ihcuac san ocniqueh nechtlatlatasqueh, campá tlaauquilistlah,

⁹campá san ocniqueh nechtlatlatasqueh namotahuan, uan onechtlatlataqueh masqui ome poual xiuitl yoquitztayah nochiualis.

¹⁰Ica non oncualan inuan uan onquihtoh: “Yehuan nochipa san mixpolohtinimih, uan amo ictlacamatih notlanauatil.”

¹¹ Ica non itich notlaueh neh onmoyectencau:

“¡Amo calaquisqueh campa intemactia noseuilis!”^k

¹² Cuali xonmotlatlatacan, nocniuan tlaniltocanih, amo yeh semeh namehuantzitzin nanconpiah namoyolo tentoc ica amocualyotl uan amo tlaniltoca, uan namechonchiualtia xonmoxilocan ixconcauacan Dios naquin meuiltitichah.

¹³ Yehyeh xonmosepanyolchicauacan nochipa, axan ihcuac oc ayamo tlami nin tonal de temaquixtilistli. Ohcon ixconchiuacan amo yeh semeh namehuantzitzin icchicaua niyolo ica nitlachacayaualis in tlahtlacol.

¹⁴ Pues axan ya itpouih iuantzin Cristo, tla queh milauac amo itcauah itmoyolchicauah inauactzinco hasta in toyacatlamilis, ohcon queh ihcuac otepuqueh itlaniltocah inauactzinco.

¹⁵ Ica non ihquin ictoua in Teotlahtolamatl:

Tla axan nanconcaquih nitlahtoltzin Dios,
amo ixconchicauacan namoyolo quemeh naquin onechixnamiqueh.

¹⁶ ¿Aquihqueh oquixnamiqueh Dios masqui yoccacah nitlahtoltzin? ¿Quenat amo nochtin naquin Moisés oquinoxitih de Egipto?

¹⁷ ¿Uan aquihqueh innauc ocalantoya Yehuatzin ome poul

xiuitl? ¿Quenat amo yeh naquin otlahtlacohqueh, uan ouitzqueh uan omiqueh campa tlaauaquilistlah?

¹⁸ ¿Uan inauac aquihqueh omoyectencau Dios amo calaquisqueh campa Yehuatzin contemactia niseuilitzin? ¿Quenat amo innauc naquin amo otlatlacamatqueh?^l

¹⁹ Tlamilauca itquitah, amo ouiliqueh ocalaqueh nic amo otlaniltocaqueh.

4 Ica non, axan quen oc catqui in tlahtol tlen omoyectencautzinoh de itcalaquisqueh campa Yehuatzin contemactia niseuilitzin, cuali xonmotlatlatacan, amo yeh semeh namehuantzitzin mocaua tlaucitlapan uan amo calaqui.

² Porque quemeh tehuan uan quemeh yehuan, otechmatiltihqueh in tlahtol tlen technonotza de niseuilitzin. Masqui ohcon, yehuan amotlen oquinmatlan in tlahtol tlen occaqueh, pues ihcuac occaqueh amo ocniltocaqueh.

³ Pero naquin yotniltocaqueh nitlahtoltzin itcalaquih campa Yehuatzin contemactia niseuilitzin. De non iseuilitzin Yehuatzin otlahtoh ihcuac ihquin oquihtoh:

Ica non itich notlaueh neh onmoyectencau:

¡Amo calaquisqueh campa intemactia noseuilis!”^m

Masqui Yehuatzin Dios conpíxtoc niseuilitzin desde ihcuac ocontlamichiu in tlatlicpactli.

^k Sal. 95:7-11 ^l Nm. 14:1-35 ^m Sal. 95:11

⁴Pues canah itich Teotlahtolamatl itquitah tlahtoua ihquin den chicometonal:

Itich in chicometonal, ihcuac Dios oconyeecoh nochi ntlachiuaitzin, omoseuih.ⁿ

⁵Uan ocsipa ihquin quihtoua:

¡Amo calaquisqueh campa in-temactia noseuilis!

⁶Pero nic poliuih ocsiquin calaquisqueh campa Dios contemactia niseuilitzin, uan nic naquin achtoh oquinmatilthiqueh in tlahtol de niseuilitzin amo ocalaqueh, nic amo otlatlacamatqueh,

⁷ica non Dios ocsipa ocontlalih ocse tonal masecalaqui itich niseuilitzin, uan non tonal yeh axan. Yehua de tlen otlahtoh David ihcuac mic xiuitl yopanoc, uan oquihtoh:

Tla axan nanconcaquih ntlaholtzin Dios, amo ixconchicauacan namoyolo.^o

⁸Tla Josué oquimahxitani in israelitas itich in tlen milauac iseuilitzin Dios, Dios acmo ocsipa otlahtosquia de ocse tonal.

⁹Ica non, yec itquitah catqui oc se seuilis tlen quinchia naquin pouih iaxcatzitzin Dios.

¹⁰Naquin calaqui campa Dios contemactia niseuilitzin, moseuia de nichiuais, sannoiuqui ohcon quemeh Dios omoseuih de ntlachiuaitzin.

¹¹Ica non, matmochicauacan, matcalaquican campa Yehuatzin con-

temactia niseuilitzin, uan ohcon amo yeh acah quintlasaluilia icchiua quemeh naquin amo otlatlacamatqueh.

¹²Tlamilauca, nitlahtoltzin Dios yoltoc uan icpia uililistli, uan oachi tlatiqui uan amo se espada tlen ocan tlatentil. Calaquei hasta toyolihitic uan hasta itich in toanima, uan tosahsaliuyan uan hasta iihitic in toomiyo, uan iclatlata in totlayoluilis uan toyoltlaniquilis.

¹³Itich nochi tlen Yehuatzin ocmochiuilitzinoh amo cah itlah tlen uilis motlaatis de ntlachiuaitzin, nochi cah tlanespan uan comotilihtoc Yehuatzin, naquin inauactzinco itquixpantisqueh nochi tlen itchiuah.

Jesucristo

toueyiteopixcatlayacancau

¹⁴Uan nic axan itpia se toueyiteopixcatlayacancau naquin oahsic iluicac inauactzinco Dios, yen Jesús iConetzin Dios, amo matmihcuanic, yehyeh matmochicauacan itich in tlaniltoquulistli tlen otsilihqueh.

¹⁵Pues itpia se toueyiteopixcatlayacancau naquin techonahsicamati, icmati nic toixcoyan amo itchicauaqueh itmotzacuilisqueh ihcuac in tlahtlacol tetilana. Yehuatzin sannoiuqui quemeh tehuan in tlahtlacol itich nochi oquinic icyoltilanas, masqui ohcon Yehuatzin amo otlahtlacoh.

¹⁶Ica non, matmotoquican ica mic yolchicualis, inauac nitiquiuahca-

ⁿ Gn. 2:2 ^o Sal. 95:7-8

icpal Dios campá Yehuatzin metzticah ica nitetlasohitalitzin, uan ompa itcahsisqueh teicnoitalis, tetlasohitalis, uan tepaleuilis yec ihcuac monictoc.

5 Nochi ueyiteopixcatlayacanqui tlapihpintli tlatzalan den tlacameh, uan ictlaliah itich non tiquitl maquintlahtoui in tocnuan inauactzinco Dios, uan macteixpanti nintetlaocolil uan nintlahpiatlataemactil ipampa nintlahtlacol.

²Yeh uili quimicnomati naquin amo icmatih tlen cuali uan ixpoliutoqueh, pues yeh noiuiqui itich tlenla tlahtlacol amo chicaoac.

³Uan ica non uilica icpia tlen ictemactis tlatemactil ipampa nitlah-tlacol, uan ipampa nintlahtlacol in tocnuan.^p

⁴Uan amacah uilis san yeh inohmah mochiuas ueyiteopixcatlayacanqui, tlamó sayeh naquin Dios icnotza icmactis non uehcapantlalilis, quemeh oquichiu iuan Aarón.^q

⁵Noiuiqui ohcon Cristo amo san yeh inohmah oquian non uehcapantlalilis uan omochiutzinoh ueyiteopixcatlayacanqui, tla yeh Dios ocueyihcachiu ihcuac oquih:

Touatzin tonnoConeu;
neh axan inmitzontiquiahca-
tlalia.^r

⁶Uan ocsican itich in Teotlahtolamatl noiuiqui quihoua:

Tehuatzin tonteopixqui ica in sintitl nochipa,
uan moteopixcayo sannoiuqui
ohcon quemeh niteopixcayo
in Melquisedec.^s

⁷Cristo, ihcuac oc onimia nican itich nin talticpactli, omotlatlauta-
taya uan chicaoac ocmonochi-
lihtzinouaya ica choquistli,
omotlatlauta inauactzinco Dios
naquin ocpiaya in chicaoualis icpa-
leuis den miqulistli,^t uan Yehua-
tzin ocontencac nic otlamouilaya
inauactzinco.

⁸Uan masqui Yehuatzin iConetzin
Dios, ica tlen otlahyouih oixpitlan
itich in tlatlacamatilis.

⁹Uan ohcon ihcuac Yehuatzin
yomochiutzinoh mahsic yec itich
nochi, oquinmactih temaquix-
tilistli tlen ica in sintitl nochipa
nochtin naquin ictlacamatih.

¹⁰Uan Dios octlalilh ueyiteopixca-
tlayacanqui ohcon quemeh niteo-
pixcayo in Melquisedec.

**Nehmactilis innauac naquin
iccauah in tlaniltoquilis**

¹¹De nochi nin, itpiah mic tlen
uilis itnamechoniluisqueh, pero
oueh senamechonahsicamatiltis,
pues simi yonamonmocuipqueh
namonyoliqueh para namontla-
ahsicamatisqueh.

¹²Yocnamiquia namonisqueh
namontlamachtanih, nic ya
namonuehcauten itich in tlanilto-
quilis, uan yeh nesi axan moniqui
yancuica senamechonmactis ni-

^p Lv. 9:7 ^q Éx. 28:1 ^r Sal 2:7 ^s Sal. 110:4 ^t Mt. 26:36-46; Mr. 14:32-42; Lc. 22:39-46

tlamachtilis Dios tlen secsaloua ihcuac yaquin peua setlaniltoca. Yonamonmocuiqueh quemeh in piltzintli tlen moniqui conis leche nic ayamo uili quicua itlah tlacual. ¹³Pues nochi naquin yoltoc san ica leche ictosniqui ayamo icyequixmati catliyah in yec tlamachtilis, nic yeh oc queh piltzintli.

¹⁴Pero in tlacual quicuah aquihqueh yoahsiqueh itich in chicalualistli, naquin ya icmatih ictlatlatasqueh tlen cuali uan tlen amo, pues ohcon yoquihmatiltihqueh nintlalnamic.

6 Ica non, amo matmocauacan san itich tlen achtoh otechmachtihqueh de Cristo ihcuac yaquin opeu ittlaniltocah, yehyeh matiacan ocachi tlaixpan, mahsic matmoscaltican itich in tlaniltoquilis. Acmo mamoniqui matechmachtican moniqui semoyolcuipas, moniqui sequincauas in chialisten tlen teuciah itich miquilis, uan moniqui setlaniltocas inauactzinco Dios, ²sannoiuqui in tlamachtilis den tluacatequilis, uan de tlenoh ictosniqui ihcuac quintlaliah ninmauan intich in tlaniltocanih, den yancuicayolilistli den miquemeh, uan de ihcuac Dios conitas tlenoh icnamiqui sehse ica in sintitl nochipa.

³Yeh nin itchiuasqueh, tiasqueh ocachi tlaixpan, tla Dios como-niquiltia.

⁴Nin ixconmatican: Naquin se tonal ocsilihqueh nitlanetzin Dios uan teuan oquitaqueh quen mouistic nitetlaocoliltzin Dios,

uan opouqueh iuan in Espiritu Santo,

⁵uan noiuqui oquixmatqueh quen mouistic nitlahtoltzin Dios, uan oquixmatqueh in chicalualis tlen poui itich in talticpactli tlen ualahtoc,

⁶uan masqui nochi non oquixmatqueh, uan yeh occauqueh in tlaniltoquilis, nonqueh tocnian acmo uili ocsipa sequinyolchicaua mamoyolcuipacan, pues yehuan quemeh oisquia yancuica icsohsatoqueh itich in cruz niConetzin Dios, uan icchiutoqueh ocsipa macuitzcacan.

⁷Quemeh in tlali tlen icchichina in quiyauitl tlen micpa uitzitl itich, ohcon ninqueh tocnian: tla non tlali ictemactia cuali tlatiyotl inauac naquin ictiquitilia, icpias nitlateochialitzin Dios,

⁸pero tla ictemactia uitzitl uan san tlenxa xiuitl, amitlah ipatiu, yeh icsilis tlauelitalis uan niyacatlamilis isqui yen tlitl.

Amo matmihcuanican itich tlen Yehuatzin omoyectencautzinoh techontlaaxcatis

⁹Masqui ohcon ittlahtouah, ityecmatih nic namehuantzitzin, nocnian tlasohten, namechonchia tlen cuali, tlen uitz iuan in temaquixtilistli.

¹⁰Pues tlamilauca, Dios yeh nochipa comochiulia tlen yec, uan ica non amo conilcauas tlen yonconchiuqueh ica tetlasohtlalistli ipampa mitoocatzin, uan quen onanquimonmatlanqueh niaxca-

tzitzin Yehuatzin, uan nic oc nanquimonmatlantoqueh.

¹¹Tlen quemah, otniquisquiyah namehuantzitzin ohcon ixconchiutocan tlen cuali hasta namoyacatlamilis, ohcon nanconmatisqueh ica nochi yolchicaualis que Dios namechonmactis tlen nanconchiah.

¹²Amo xonmocuipacan namontlatziuqueh, tlamo yeh ixquimontlasaluilican naquin ica nintlaniltoquilis uan quen tlaxico-uah icsiliah tlen Dios omoyectencauquinmactis.

¹³Ihcuac Dios omoyectencau inauac in Abraham, Dios omoyectencautzinoh ica yeh inohmah itooaatzin, nic amo catqui ocse naquin ocachi ueyihcatzintli uan amo Dios, tlen ica nitoocaa omoyectencautzininosquiaya.

¹⁴Ocmihtaluihtzinoh: “Tlamilauca, inmitzonmactis tlailiuis mic tlateochialistli, uan tlailiuis inquinmiquiyaltis naquin oneuasqueh itich touatzin.”^u

¹⁵Uan ohcon, Abraham omochix ica pacahyouilistli, uan ocilih tlen Dios omoyectencau inauac.

¹⁶Ihcuac in tocnian motencauah icchiasqueh itlah, ictoocayotiah naquin ocachi icuehcapanmatih, uan tla yochiuqueh ohcon, ompa tlami tlahtol, acmo icpatlah nintlahtol.

¹⁷Sannoiuqui ohcon Dios oquinic techyecmatiltis in tehuan naquin techtlaaxcatis, nic amo icpatlas

nitlayoluiltzin ica tlen omoyectencautzinoh techtlaaxcatis, ica non omoyectencautzinoh ica nitoocaa-
tzin.

¹⁸Uan ohcon catqui nin ome tlamantli: ic se, Yehuatzin omoyectencautzinoh techontlaaxcatis, ic ome Yehuatzin ica nitoocaa-
tzin omoyectencautzinoh. Nochi nin amo mopatlas, pues Yehuatzin amo istlacati. Uan ica nochi nin, itcahsih mahsic yolchicaualis tehuan naquin otmopaleuitoh inauactzinco uan otniltocaqueh in nichialistli tlen Dios otechmactih.

¹⁹Necah nichialis yehua itlachicaualo in toyolo, quemeh in tipostlachicaualonitlen icpia in barco. In tonichialis motlatzitzquilia campatlailliuic tlamouisticapantzinco, tlahtic den tilmahitlen ictlahcoxiloua in teopantli,^v

²⁰campa Jesús ocalac topampa otechontlapouilito in ohtli, uan omochiutzinoh ica in sintitl nochipa toueyiteopixcatlayacancatzin, uan niteopixcayo ohcon quemeh niteopixcayo in Melquisedec.^w

Niteopixcayo Jesús moniuilia iuan niteopixcayo in Melquisedec

7 In Melquisedec oyah ueyitiquiuahqui ompa Salem, uan teopixqui inauac in Dios Ueyihcatzintli. Yeh oquis de Salem uan ocnamiquito in Abraham ihcuac yeh oualmocuiquintlanitocnoquin cuahcual tiquiuahqueh, uan Melquisedec

^u Gn. 22:16-17 ^v Lv. 16:2 ^w Sal. 110:4

oquiliuh tlahtol de tlateochiuahlistli.

²Uan Abraham ocmactih nimahtlacyo nochi tlen oquitlan itich non ixnamictli.^x Nitoocaa in Melquisedec ictosniqui “ueyitiquiahqui cuali tlayectlalani”, uan yeh ocatca ueyitiquiahqui ompa Salem, tlen ictosniqui “seuilstli”, ica non nitoocaa noiuqui ictosniqui “ueyitiquiahqui tlen cualica seuilstli”.

³Amo tlen secmati de nipapan dion nimaman, dion amo secmati canih ualeuani, amo secmati quemanian ones dion quemanian omic. Moniuilia iuan niConetzin Dios, nic ueyiteopixcatlayacanqui ica in sintitl nochipa.

⁴Ixconitacan, quen ueyi ipanti in Melquisedec. Hasta in Abraham, naquin itich itualeuah, yeh ocmactih nimahtlacyo tlen oquitlan itich non ixnamictli.

⁵Tlamilauca, nitlanauatil Moisés quincaulia tlen ualeuah itich Leví, naquin teopixqueh, macsilican den israelitas, masequihto de nimicnivan, nimahtlacyo nochi tlen icpiah,^y masqui maican ualeuanih inauac Abraham sannoiuqui quemeh yehuan.

⁶Pero in Melquisedec amo opou semeh tlen oneuah itich Leví. Uan yeh masqui ohcon ocsilih imac in Abraham nimahtlacyo tlen oquitlan, uan Melquisedec octeochiu in Abraham, naquin Dios inauac omoyectenau.

⁷Nin amacah uilis quihtos amo milauac, naquin teteochiua ocachi ueyi ipanti uan amo naquin icsilia in tlateochiuahlistli.

⁸Uan tlamilauca, in teopixqueh ualeuanih inauac Leví, naquin nican icsiliah in mahtlacyo, yehuan tlatlicpactlacameh naquin pohpoliuh, pero Melquisedec in Teotlahtolamatl ictematiltia yoltoc.

⁹Uan ihcuac Abraham ocmactih in Melquisedec in mahtlacyo, ictosniqui noiuqui in teopixqueh tlen ualeuah itich Leví uan icsilia in mahtlacyo, noiuqui octemactihqueh.

¹⁰Masqui in Leví, naquin ualeuani inauac Abraham, ayamo onesia ihcuac in Melquisedec ocnamiquito in Abraham.

¹¹Uan ohcon, tla in tocnivan ouilinih omochipauanih ica in tiquitl tlen niteopixcayo in Leví icchiua ica nitlanauatil Moisés, tla ohcon, ¿tleca oc omonic maualeua ocse teopixqui tlen niteopixcayo mai quemeh niteopixcayo in Melquisedec, uan amo quemeh niteopixcayo Aarón?

¹²Uan tla mopatla in teopixcayotl, uilica moniqui noiuqui mopatlas in tlanauatil.

¹³Pues Jesús, de naquin in Teotlahtolamatl ictematiltia non, Yehuatzin ualeuani itich ocse pantli de tocnivan, tlen amaquinten yehuan oyah teopixqui.

¹⁴Tlamilauca, yec itmatoqueh in toTecotzin ualeua inauac Judá

^x Gn. 14:17-20 ^y Nm. 18:21

uan amo inauac Leví, uan nitlanauatil Moisés amotlen oquihtoh tla isqueh teopixqueh tlen ualeuah itich Judá.

¹⁵Uan nochi nin ocachi cuali se-cahsicamati, pues nocse yancuic teopixqui tlen axan oualmoquitzteu, niteopixcayo ameh quemeh niteopixcayo in Melquisedec.

¹⁶Yehuatzin amo omochiu teopixqui ica in tlanauatil tlen quihtoua itich aquih icpia tlen ualeuas, tla yeh omochiu teopixqui ica in chicalis tlen ualeua itich niyolilis tlen icpia ica in sintitl nochipa.

¹⁷De Yehuatzin ihquin motematiltia itich in Teotlahtolamatl:

Tehuatzin moteopixcayo isqui ica in sintitl nochipa,
uan moteopixcayo isqui quemeh niteopixcayo in Melquisedec.^z

¹⁸Uan ohcon Yehuatzin oscicantlalih in tlanauatil tlen achtoh, pues omotaco amo tematlani, uan amo ouilic oquichiu itlah topampa.

¹⁹Pues in tlanauatil amo ouilic otechyectlalih inauactzinco Dios, uan ica non axan Yehuatzin otechmactih itlah ocachi cuali tlen ica uilis itmoyolchicauasqueh, uan ica uilis tahsisqueh inauactzinco Dios.

²⁰Uan nochi nin amo omochiu san ohcon, tla yeh Dios omoyectencau ica nitoocaatzin.

²¹Pues nocsiquin teopixqueh tlamilauca amacah omoyectencau tla mochiasqueh teopixqueh, pero

Jesús omochiu teopixqui nic Dios omoyectencau isqui teopixqui, ihcuac ihquin oquihtoh:

In toTecotzin omoyectencautzinoh uan amo motlahtolpatlatzinos:

“Tehuatzin moteopixcayo isqui ica in sintitl nochipa, uan moteopixcayo isqui quemeh niteopixcayo in Melquisedec.”

²²Uan ohcon ica Jesús oehcoc se tlahtolsintitl tlen ocachi cuali uan amo in tlen achtoh.

²³Nocsiquin teopixqueh yopanoqueh miqueh, pues ihcuac oyacatlamia ninyolilis ompa otlamia niteopixcayo.

²⁴Pero nic Jesús ica in sintitl nochipa yoltoc, niteopixcayo ayic yacatlamis.

²⁵Ica non uili quinmaquixtia ica in sintitl nochipa, nochtin naquin ica Yehuatzin motoquiah inauactzinco Dios, pues Yehuatzin ica in sintitl nochipa yoltoc quintlahtouihtoc inauactzinco Dios.

²⁶Pues yeh nin ueyiteopixcatalayacani tlen otechpolouaya: mouistic yolchipauac, amo quixmati icchias tlen amo cuali, amotlen tlahtlacol itich, tlasticantlalil den tlahtlacouanih, uan ocuehcapantlalihqueh ocachi uehcapan uan amo in iluicac.

²⁷Uan Yehuatzin amo quemeh nocsiquin ueyiteopixcatlayacanequeh, tlen mostlah uilica ictlalialah tlahpialtlatemactil, achtoh

^z Sal. 110:4

ipampa yehuan nintlahtlacol, uan ompa ipampa nintlahtlacol in tocnian.^a Yehuatzin ihcuac omotemactihtzinoh ocmochiuihltzinoh san ic sipa uan ica in sintitl nochipa.

²⁸Uan ohcon itquitah, nitlanauatil Moisés quintlalia uehueyiteopixcatlayacanqueh tlalticpactlacameh tlahtlacohehqueh; pero satepan de non, Dios ica in tlahtol tlen omoyectencau octlalih ueyiteopixcatlayacanqui yeh niConetzin, naquin mahsic chipauac ica in sintitl nochipa.

Jesús techontlahtouia itich in yancuic tlahtolsintilil

8 Yeh nin tlen ittohtoqueh: itpiah se mouistic ueyiteopixcatlayacanqui naquin omotlalih iyecmapantzinco Yehuatzin in Dios Ueyihcatzintli, ompa in iluicac campa motlanauatilia.^b

²Uan yehua teopixqui tiquitoc itich in tlen milauac teopantli ompa in iluicac, tlen tlachiutli ica in toTecotzin uan amo ica ima tlalticpactlacatl.

³Nochi ueyiteopixcatlayacanqui ictlaliah yehua mactemacti in tlaocolil uan in tlatemactil inauactzinco Dios, uan ica non Jesús noiuqui omonic itlah tlen comotemactilihtzinos.

⁴Tla Yehuatzin ometztiyani nican tlalticpac, Yehuatzin dion amo oisquia semeh den teopixqueh, pues ya cateh teopixqueh tlen

icmactiah Dios in tlatemactilten quemeh quihtoua in tlanauatil.

⁵Ninqueh teopixqueh itich in teopantli campa tiquitih, nochi san queh iecauil in tlen milauac teopantli tlen catqui iluicac. Pues in Moisés, ihcuac yocpeualtisquia icchiuas in teopantli de mantiado, Dios oquiluih: “Ixquita, ixchiua nochi ohcon quemeh tlen onmitznextilih itich in tipetl.”^c

⁶Pero axan niteopixcayo Jesús simi ocachi cuali nic techontlahtouihtoc inauactzinco Dios itich in tlahtolsintilil tlen ocachi cuali, tlen motlachicaulia itich in tlen ocachi mouistic tlateochiualistli tlen omoyectencautzinoh Yehuatzin tonauac.

⁷Tlamilauca, tla non achtoh tlahtolsintilil amitlah ocolouani, amo omoniquisquia ocse yancuic.

⁸Pero Dios octeahsicamatiltih nic amo oahsitoya, ica non ictoua:

Ahsis in tonal, icmihtalua in toTecotzin,
inchiuas ocse yancuic
tlahtolsintilil iuan in tocnian
uan tlen pouih Israel uan Judá.

⁹Amo isqui quemeh in tlahtolsintilil tlen onicchiu inuan namoyauehcautahuan ihcuac onquinmauilan uan onquinquixtih den tlali Egipto.

Yehuan ihcuacon amo octlacamatqueh necah tlahtolsintilil,

^a Lv. 9:7 ^b Sal. 110:1 ^c Éx. 25:40

ica non neh sa onquincau
insel, quihtoua in toTeco-
tzin.

¹⁰ Yeh nin in tlahtolsintilil tlen
inchiuas inuan in tocnian
de Israel,
satepan itich nonqueh tonal-
meh, quihtoua in toTeco-
tzin:

Notlanauatil intlalis itich nin-
tlayoluilis,
uan inquihcuilos itich nin-
yolo.
Uan neh nisqui ninDios,
uan yehuan pouisqueh no-
axcauan.

¹¹ Amaquin moniquis icmactis
nitlalticpaquicniu,
uan amaquin quiluis nicniu
ihquin:

“¡Ixquixmati in toTeco-
tzin!”
pues ihcuacon nochi nechix-
matisqueh,
mayeh naquin ocachi oc tzoh-
tzocotzin
uan mayeh naquin ocachi ya
ueyi.

¹² Inquintlapohpoluis nochi
nimamocualichiuialis,
uan nintlahtlacol ayic oc in-
quilnamictos.^d

¹³ Ihcuac Dios quihtoua “yancuic
tlahtolsintilil”, Yehuatzin techahsi-
camatiltihtoc non achtoh tlahtol-
sintilil yomocau tlacuitlapan,
uan ixconmatican, tlen mocautiu
tlacuitlapan uan yacatlantiu, ya
pohpoliuis.

In tiquitl itich in talticpacteopantli

9 In tlen achtoh tlahtolsintilil
ocpiaya tlanauatil tlen oc-
touaya quenih icchuiasqueh in
tiquitl den tetlacachiuialis, uan
ocatca se talticpacteopantli.

² Non talticpacteopantli otlahco-
xiliutoya: in tlen omocauaya ic
quiyauac octoocaayotayah Tla-
mouisticapantzinco. Ompa ocatca
in candelero ica chicome tlauil,
uan in mesa campa octlalayah
in mahtlactlamome pan tlen tla-
temactil.

³ Uan in tlen omocauaya ic tlahtic
den tilmahtli tlen octlahcoxilohto-
ya in teopantli, octoocaayotayah
Tlailiuis Tlamouisticapantzinco.

⁴ Ompa ocatca se altar tlachiutli
ica oro tlen ipan octlatayah in-
cienso, teuan ompa ocatca in arca
ilnamicocatl den tlahtolsintilil tlen
ic nouiyan oquimiliutoya ica oro.
Iihtic non arca ocatca se xaloh
tlachiutli ica oro tlen ocpiaya in
maná. Uan noiqui iihtic in arca
ocatca nitopil in Aarón tlen oyan-
cuicamaxiuyouac uan ocuipon,
uan noiqui ompa ocatcah in ti-
patlacten tlen intich oihcuiliutoya
in tlanauatil den tlahtolsintilil.

⁵ Ipan in arca ocatcah iluicactlati-
tlanten tlachiuten ica oro, intoocaa
querubines, tlen intich omonexta-
ya nimouisticchipaucatlanetzin
Dios, uan ica ninmaihtlapaluan oc-
panquemiah in arca campa omo-

^d Jer. 31:31-34

chihuahua in tetlapohpoluulistli den tlahtlacol. De nochi non axan amo uilis ocachi intlahtos.

⁶Ohcon ochihchiutoya nochi non, uan itich in calihtictli den teopantli tlen mocaua ic quiyuac, in teopixqueh mostlah calaquih ompa icchiuatiueh in tiquitl den tetlacachiuah.

⁷Pero itich in calihtictli tlen mocaua ic tlahtic, ompa calaquih sayeh in ueyiteopixcatlayacanqui, uan calaquih sayen sipa in xiuitl. Uan ihcuac calaquih uilica icuica istli, tlen ictemactia ipampa nitlahtlacol uan ipampa nintlahtlacol in tocnian tlen occhiuqueh uan amo momacaqueh cuenta.^e

⁸Ica nochi nin in Espiritu Santo techahsicamatiltia nic ihcuac oc omochiutoya in tiquitl itich in calihtictli tlen mocaua ic quiyuac, ayamo omotlapouaya in ohtli tlen teuca campa Tlailiuis Tlamouisticapantzincó.

⁹Nochi nin techcauilia se tlanextilil axan. Technextilia que nochi in tetlaocolil uan in tlatemactil amo uili icchiua mamomachilican acmo tlahtlacolehqueh naquin tetlacachiuah ohcon,

¹⁰porque nin tlamantli tetlacachiuah ictenextilia san tlen uilis sequicuas uan seconis, uan mic tlamantli quenih semochipauas. Nochi non icpia tlen quitas san para tlen pani mota, uan Yehuatzin oquicau macpia chicalis san hasta ihcuac Dios otlayectlah.

In tiquitl itich in teopantli tlen cah iluicac

¹¹Pero axan youalmouicac Cristo, ueyiteopixcatlayacanqui de nochi in tlateochiualistli tlen Yehuatzin techualiquilia, uan metzticah itich in teopantli tlen ocachi ueyi uan tlen mahsic ahstoc itich nochi, uan amo tlamachiuah, masequihto non teopantli amo poui nican tlatitpac.

¹²Yehuatzin san ic sipa uan ica in sintitl nochipa ocalac campa Tlailiuis Tlamouisticapantzincó, uan Yehuatzin amo octemactito imeso in chivos uan piselohten, tlayeh yeh niesotzin. Uan ohcon ica otechontlaxtlau uan otechmaquixtih ica in sintitl nochipa.

¹³Tla nimeso in cuapouehten uan chivos,^f uan nitliconixó in becerrita,^g ihcuac ica quimahuichiah naquin amo chipauaqueh, quinchipaua ic pani,

¹⁴¡quemach amo ocachi mic chicalistli icpia niesotzin in Cristo!, naquin ica in Espiritu tlen metzticah ica in sintitl nochipa, omotemactih chipaucatzintli inauactzincó Dios, para icchipauas in totlalnamic den chiuah tlen teuca itich miquilis, uan ohcon uilis ittlaachiuasqueh Dios naquin meultitlicah.

¹⁵Ica non, Jesucristo yehua tote tlahtouihcau tlen ica omochiu in yancuic tlahtolsintilil, para matsilican in tlateochiualistli tlen ica

^e Lv. 16:2-34 ^f Lv. 16:15-16 ^g Nm. 19:9, 17-19

in sintitl nochipa uehcauas, tlen Dios omoyectencau quimaxcatis naquin oquinmonochilih. Porque Cristo ica nimiquilitzin yocontlaxtlau in totlahtlacol tlen otchiquueh itich in tlen achtoh tlahtolsintilil.

¹⁶Pues ihcuac acah icchiua se amatl campa quihtohtos tlenoh quimaxcatia sehse niconeuan, non amatl amitlah ipatiu tla ayamo miqui naquin icniqui tetlaaxcatis.

¹⁷Porque ica nimiquilis naquin tetlaaxcatihtoc, non amatl cana nichicaualis, pero ihcuac ayamo momiquilia naquin tetlaaxcatihtoc non amatl ayamo cana chicaualis.

¹⁸Ica non, noiuiqui itich in tlen achtoh tlahtolsintilil omonic xauanis istli.

¹⁹Pues ihcuac Moisés oquinmatilitih in tocnian nochi tlen quihtoua in tlanauatil, oquian nimeso in piselohten uan den chivos iuan atl. Uan noiuiqui oquian chichiltic tohmitl uan xiuitl de hisopo, uan ocolactih itich in istli uan atl, uan ocahuichih in tlahcuilol uan nochtin in tocnian.

²⁰Uan ihquin oquimiluih: “Nin yen istli tlen ica cana chicaualis in tlahtolsintilil tlen Yehuatzin oualtlanauatih para namehuanztizin.”^h

²¹Uan noiuiqui ica in istli ocahuichih in teopantli de mantiado iuan nochi tlen ompa occuah ica in tlaacachualis.ⁱ

²²Porque quen tlanauatil quihtoua, mic tlen sa mochipaua ica

istli, uan tla amo moxauania istli amo cah tetlapohpoluulistli.^j

Cristo omotemactih san ic sipa uan ohcon otechonmaquixtih den tlahtlacol

²³Ica non, uilica omonic xauanis istli para ohcon ica mochipauas tlen san itlanihniuitil tlen cah iluicac. Pero tlen poui iluicac uan amo san tlanihniuitil, omonic se tlatemactil ocachi cuali.

²⁴Porque Cristo amo ocalac itich teopantli tlen in tlaacameh occhiquueh, tlen san itlanihniuitil in tlen milauac teopantli. Tla yeh Cristo ocalac ompa iluicac, uan ompa motlatlauhitchah topampa inauacztinco Dios.

²⁵Sannoiuqui Cristo amo micpa omotemactihtzinoh, amo quemeh in ueyiteopixcatlayacanqui tlen nochipa xiutica icpia tlen calaquis campa Tlailiuis Tlamouisticapanztinco uan icuica ocse istli tlen amo iyohca.

²⁶Pues tla oini ohcon, Cristo omomiquisquiaya motemactis micpa desde ihcuac omochiu in talticpactli. Pero axan, itich ninyacatlamilis in tonalmeh, Yehuatzin oualah uan omotemactihtzinoh san ic sipa uan ica in sintitl nochipa, para ica nimiquilitzin conpohpolos in totlahtlacol.

²⁷Dios octlalih mamiquican san ic sipa in talticpactlacameh, uan satepan mamoteixpantican inauac-

^h Éx. 24:6-8 ⁱ Lv. 8:15 ^j Lv. 17:11

tzinco Yehuatzin naquin quihtos tlenoh intich icnamiqui.

²⁸Ohcon noiuqui Cristo omotemactih san ic sipa, para quinmaquixtis miqueh de nintlahtlacol. Uan satepan Yehuatzin monextis ya ic opa, pero acmo motemactis ipampa in totlahtlacol, tlamo yehyeh quimanaqui naquin icmochialihcicateh.

In tlahpialtlatemactil amo uili tetlahtlacolchipaua

10 Uan ohcon nitlanauatil Moisés poui iecauilo nochi tlen cuali tlen Dios oquihtoh techualmactis, pero in tlanauatil ayamo yehua, pues yeh san iecauilo. Ica non in tlanauatil ayic uili quinyolohchipaua naquin nochipa xiutica ica tlatemactil yaueh inuactzinco Yehuatzin.

²Tla queh yec cuali oquinyolohchipauani in tlatemactil, acmo octemactisquiah, pues tla ica yomochipauanih, acmo omomachilisquiah tla tlahtlacolehqueh.

³Pero tlen icchiaua nochi nin tlatemactil nochipa xiutica, yehyeh quimilnamictia nintlahtlacol.

⁴Uan ohcon itquitah, nimeso cuacuehqueh uan chivos amo uili tetlahtlacolchipauah.

Nimiquilitzin Cristo techonyolohchipaua den totlahtlacol

⁵Ica non Yehuatzin, ihcuac oalmouicac itich nin tlatiactli, ocmihtaluih:

Tehuatzin amo otcomoniquilitih itlah tetlaocolil noso itlah tlahpialtlatemactil matitzonmactican,

ica non otnechonmactih notlalnacayo tlen ica inmotemactis.

⁶Amo omitzonpactih tlahpialtlatemactil dion itlah tetlaocolil tlen ica sectlahtlani tetlapohpoluilis den tlahtlacol.

⁷Ica non onquihtoh: “Neh nican nican, Tehuatzin Dios, onchiuaco motlaniquilitzin, ohcon quemeh tlen ihcuiliutoc de neh itich in Teotlahtlomatl.”^k

⁸Achtoh, Yehuatzin ihquin oquihtoh: “Dios amo ocmoniquilitih tetlaocolil noso tlahpialtlatemactil tlen ica sectlahtlani tetlapohpoluilis den tlahtlacol, masqui in tlanauatil ohcon tlanauatia masechiua.”

⁹Uan satepan ihquin oquihtoh: “¡Neh nican nican, Tehuatzin Dios, onchiuaco motlaniquilitzin!” Ohcon Dios oconpatlac in tlen achtoh uan ocontlalih tlen yancuic ica Yehuatzin Cristo.

¹⁰Dios otechonsicantlalih den tlahtlacol nic Jesucristo oconchiu nitlaniquilitzin ihcuac omotemactihtzinoh queh tetlaocolil, san yen sipa uan ica in sintitl nochipa.

¹¹Tlamilauca, nochi teopixqui mostlah tiquiti icah in teopantli, uan micpa ictlalihtoc sayeh non

^k Sal. 40:6-8

tlatemactil tlen amo queman uili ictepohpoluiliah in tlahtlacol.^l

¹²Pero Cristo omotemactihtzinoh san ic sipa uan ica in sintitl nochipa ipampa in totlahtlacol, uan omotlalihtzinoh iyecmapantzinco Dios.

¹³Ompa mochixticah maahsi in tonal ihcuac Dios quintlalis nitecocolihcauan itlampa nicxiuan.^m

¹⁴Uan ohcon quen san ic sipa omotemactihtzinoh, Yehuatzin mahsic yoquinchipau ica in sintitl nochipa naquin Yehuatzin quinsicantlalia den tlahtlacol.

¹⁵Nochi nin noiuqui in Espíritu Santo techonmatiltia, pues achtohtica ocmihtaluih:

¹⁶Yeh nin tlen inuan
inmotlahtolsintilis
satepan itich nonqueh tonal-
meh, quihtoua in toTeco-
tzin:
Notlanauatil intlalis itich nin-
yolo,
uan inquihcuilos itich nintlal-
namic.ⁿ

¹⁷Uan satepan quihtoua:
Acmo queman inquilnamictos
nintlahtlacol uan nimamo-
cualichiualis.^o

¹⁸Pues campa catqui tetlapohpolu-
uilis den tlahtlacol, acmo moniqui
tlatemactil ipampa in tlahtlacol.

**Amo matquihcuanican in
totlaniltoquilis inauactzinco Dios**

¹⁹Ica non, nocniuan, axan ica
niesotzin Jesucristo ya uili itcala-

quih ica mic yolchicaualis campa
Tlailiuus Tlamouisticapantzinco.

²⁰Itcalaquih itich in yancuic ohtli
tlen ictemactia yolilis, tlen Yehua-
tzin ica nimiquilitzin otechon-
tlapouilih. Nin ohtli icpanauia in
tilmahtli tlen ictlahcoxiloua in teo-
pantli.

²¹Uan ya itpiah se toueyiteopixca-
tlayacancau naquin tlayacantoc
itich nichantzin Dios iluicac.

²²Ica non matmotoquican inau-
actzinco Dios ica se toyolo tlen
amo macpia tlahcayaualis. Mat-
motoquican ica mic yolchicaua-
lis inauactzinco, pues Yehuatzin
yoconchipau in toyolo, para ohcon
acmo matmachilihtocan techte-
iluia in totlahtlacol, uan Yehua-
tzin yocchipau in totlalnacayo ica
chipauacatl.

²³Amo matmihcuanican uan
amo matyolometican ittematil-
tihtosqueh in tonichialis de tlen
itsilisqueh inauactzinco, porque
Yehuatzin milauac comochiuilih-
tzinoh tlen omoyectencautzinoh.

²⁴Mattemocan itmosepanyol-
chicauasqueh quenih uilis ocachi
itpiasqueh tetlasohtlalis uan it-
chiasqueh tlen cuali.

²⁵Uan amo matcauacan itmonichi-
cosqueh ittlacachiuasqueh Dios,
ohcon quemeh siquin yomihmat-
queh acmo monichicouah; yeh
matmosepanyoleuacan, uan oca-
chi nic ya ehcotoc nech tonal
ihcuac ualmouicatzinos Yehua-
tzin.

^l Éx. 29:38 ^m Sal. 110:1 ⁿ Jer. 31:33 ^o Jer. 31:34

²⁶Pues tla oc ituilitah ittlah-tlacohtosqueh axan ihcuac ya it-quixmatih in tlen milauac, acmo cah tlatemactil tlen uilis techquixtilis in totlahtlacol.

²⁷Sa totich mocaua itchixtosqueh ica nimohtil in ueyitemohtih tlah-tol de tlatzacuilitis iuan necah temohtih tlitl tlen mocuicuitoc tlen quinpohpolos naquin quixnamiquih Dios.

²⁸Tla acah amo ictlepanita nitlanauatil in Moisés uan icchiua itlah tlen quixnamiqui, uan omen noso yeyin quitah uan icteiluah, non tocníu uilica icpohpolouah uan amitlah teicnoitalis icpialiah.^p

²⁹Tla nin ohcon, xonmoyoluican, ¿quenat ocachi amo icnamiqui ueyi tlatzacuilitil naquin ica nichiuah icxoxacualoua niCone-tzin Dios, uan quita queh amitlah ipatiu niesotzin tlen ica Yehuatzin omotlahtolsintilih touan,^q tlen ica Yehuatzin ocsicantlali den tlah-tlacol, uan noiuqui quixnamiqui in Espíritu tlen Dios techontlaocolia?

³⁰Itquixmatih Yehuatzin naquin ihquin oquihto: “Yen neh naquin inquincupilis quen icnamiqui naquin icchiuah tlen amo cuali, yen neh intelaxtlauis.”^r Uan noiuqui icmihtalua: “In toTeczotzin quimiluis niacxauan tlenoh icnamiqui icsilis sehse.”^s

³¹¡Simi ueyicatemohtih seuitzis imac in Dios ueyihcatzintli!

³²Ixconilnamiquican quenih onamoncatcah namehuantzitzin

yauehcau, itich necateh tonalten ihcuac onamonpeuqueh namon-tlaniltocah, quen onanconxicoh-queh mic chicauac tlamantli tlahyouilistli.

³³Siquin namehuantzitzin tlen-saso onamechonihiluihqueh uan onamechontlapanoltihqueh, uan onamonmochiuqueh queh intlamouisol, uan ocsiquin namehuantzitzin onamonteuantihqueh iuan tlen ohcon otlapanotoyah.

³⁴Onanquimonicoitaqueh naquin otzacutoyah. Uan ihcuac onamechoncuihqueh tlen onanconpiayah, ica paquilstli onanconyolxicoh-queh non, pues nanconmatoqueh tlen namoaxca itich in iluicac ocachi cuali, uan uehcauas ica in sintitl nochipa.

³⁵Ica non amo ixconpolocan namoyolchicualis, pues ica non namoyolchicualis nanconsilis-queh mouistic tlahtlail.

³⁶Moniqui namontlaxicosqueh itich in tlahyouil, uan ohcon itich non motas nanconchiutoqueh nitaniquilitzin Dios, uan ohcon nanconsilisqueh tlen Yehuatzin omoyectencautzinoh.

³⁷Pues in Teotlahtolamatl quih-toua:

Sa poliui tipitzin,
naquin icpia tlen uitz, uitz
uan acmo uehcaua.

³⁸Naquin yolchipauac, ica nitaniltoquilis icpias yolilis,

pero tlaqueh mocuipa tlacuitlapan, acmo icpaquilismacas noyolo.^t

³⁹Tlen quemah, tehuan amo itpouih iuan naquin mocuipah tlacuitlapan uan yaueh itich ninpoliuh, tla yeh itpouih iuan tlen tlaniltocah uan icpiah yolilistli tlen ica in sintitl nochipa.

In tlaniltoquilistli

11 In tlaniltoquilis ictosniqui secpias sansimi nochi in yolchicaualis secsilis tlen secchixtoc, tlamilauca secmatis nic itlah, mas amo motztoc, yeh ompacah.

²Ica nicancah tlaniltoquilis Dios oquinyequitac in toyauehcautahuauan.

³Ica in tlaniltoquilis itcahsicamatih nic nochi tlen catqui omochiu ica nitlahtoltzin Dios, uan ohcon nochi tlen cah omochiu ica tlen amo mota.

⁴Ica in tlaniltoquilis, Abel oc-mactih Dios ocachi cuali tlatemactil uan amo in Caín. Uan ica non Dios oquitac yolchipauac in Abel, uan ocontematiltih non nic oconsilaya nitlatemactil. Uan masqui in Abel yomic, nitlaniltoquilis techmactihtoc hasta axan.

⁵Ica in tlaniltoquilis, Enoc amo oquitac miqulih, pues Dios ocomouiquilih. Amo ocahsiqeh nitlalnacayo, pues Dios ocmahcucuilih. In Teotlahtolamatl ictematiltia nic ihcuac Dios ayamo

ocahcocuia, Enoc oquipix niteyequitalitzin Yehuatzin.^u

⁶Tlamilauca, naquin amo icpia tlaniltoquilistli, ayic uilis icpaquilismacas Dios. Pues moniqui naquin uitz inauactzinco Dios, macniltoca nic milauac metzticah, uan nic quinmouistic tlaxtlaui naquin icmotemoliliah.

⁷Ica in tlaniltoquilis, Noé, ihcuac Dios ocnehmactih opanosquia itlah tlen ayamo omotaya, yeh otlamouilih inauactzinco uan ochihchih in arca, tlen itich ompaleuuh yeh uan nichanehcauan. Ica non tlaniltoquilis yeh oquinmatiltih in talticpactlacameh nic quinchia in tlatzacuiltlis. Uan ica non tlaniltoquilis Dios ocsilih queh chipauac quemeh nochtin naquin tlaniltocah inauactzinco.

⁸Ica in tlaniltoquilis, Abraham otlatlacamat ihcuac Dios oquinox mayau campac ocsilisquia tlen Dios ocaxcatisquia. Oquis masquidion amo ocmatia canih ahsitiu.

⁹Ica in tlaniltoquilis ochanchiu quemeh motepaluani itich in tlali tlen Dios omoyectencau caxcatis. Ochanchiutinin itich cali de mantiado, sannoiqui in Isaac uan Jacob, naquin noiqui imaxca in tlahtol de Dios tlen octouaya inyohca isqui non tlali.

¹⁰Ohcon ochanchiu Abraham nic ochixtoya in iluicac campac cah in mouistic altipetl tlen ica in sintitl nochipa isqui. Non mouistic altipetl tlachitli ica Yehuatzin

^t Hab. 2:3-4 ^u Gn. 5:21-24

uan ameh quemeh nitlaniquilitzin.

¹¹Ica in tlaniltoquilis, Sara oc-silih de Dios chicaualis tlen ica uilis icpias se iconeu, masqui amo ouilia oquinpiaya coconeh. Uan masqui simi ya tenantzin, oquipix niconeu, pues ocmatia nic amo motlahtolpatlas Yehuatzin naquin ohcon omoyectencautzinoh.

¹²Uan ohcon Abraham, masqui ya itich niyacatlamilis, itich non se tocniu oualeuqueh miqueh, quemeh in sitlalimeh tlen cateh iluicac,^v uan quemeh in xali tlen cah itenco in mar tlen amo uili sec-poua.^w

¹³Nochtin ninqueh tocnian omiqueh uan ayamo oc-silihqueh tlen Dios innauac omoyectencau. Masqui ohcon, ica nintlaniltoquilis oquitaqueh tlen oc-silisquiah, mas san ocuehcaitaqueh, [uan ocniltocaqueh] uan opaqueh ica non. Uan octematiltihqueh nic amo nican opouiah, tla yeh san motepaluanih itich nin tlali.^x

¹⁴Naquin ohcon tlahtouah, yec icnextiah nic ictemouah ocse tlali campa chanchiuasqueh.

¹⁵Pues tlaqueh ocyoluihtonih yen tlali campa oualquisqueh, oc ouilisquiah mocuipasqueh ompa.

¹⁶Pero yehuan oquinyoltilan se tlali tlen ocachi cuali, masequih-to, yen iluicac. Ica non Yehuatzin amo pinaua pouis inDios, uan yoquinyectlalilih se mouistic altipetl ompa iluicac.

¹⁷Ica in tlaniltoquilis, in Abraham octemactihtoya queh se tlatemactil nisinticoneu Isaac, ihcuac Dios oquinic ictlatlatas nitlaniltoquilis. Octemactihtoya niconeu, masqui Dios omoyectencautzinoh inauac

¹⁸ihcuac oquiluih: “Ica in Isaac miqueh oneuasqueh de teh.”^y

¹⁹In Abraham ocmatia nic Dios chicaucautzintli quinyancuicayolitit in miquemeh, uan queh oisquia de ompa ocyancuicasilih niconeu.

²⁰Ica in tlaniltoquilis, Isaac oquimiluih in Jacob uan Esaú tlahtol de tlateochiualis tlen quihtoua tlenoh icsilisqueh satapan.^z

²¹Ica in tlaniltoquilis, Jacob, ihcuac yomomiquilisquia, oquimiluih tlahtol de tlateochiualis sehse niconeuan in José, omotlachicauilih itich nitopil uan octlacachiu Dios.^a

²²Ica in tlaniltoquilis, José, ihcuac yomomiquilisquia, yoquihtohca nic nichancauan de Israel quisasqueh de Egipto, uan oquinhahnauatih in israelitas tlenoh occhiuasquiah ica niomiyouan ihcuac yehuan yoquisasquiah oc-cauasquiah non tlali.^b

²³Ica in tlaniltoquilis, ihcuac otlacat Moisés, nitahuan octlaatihqueh yeyi tlapoual, nic yehuan oquitaqueh se piltzintli simi cualtzin, uan amo oquixmouilihqueh nitlanauatil in Faraón tlen octouaya maquinmictican ninconeuan.

²⁴Ica in tlaniltoquilis, Moisés, ihcuac ya tlatatl, amo oquinic ma-

^v Gn. 15:5 ^w Gn. 22:17 ^x Gn. 23:4 ^y Gn. 21:12 ^z Gn. 27:27-29, 39-40

^a Gn. 47:31-48:20 ^b Gn. 50:24-25; Éx. 13:19

quitacan queh iconeu nichpocau in ueyitiquiahqui Faraón.^c

²⁵Yehyeh ocpihpín tláhyouis iuan israelitas, iaxcauan Dios, uan amo mopaquilismacas itich in paquilistli tlen san panoua, tlen ictemaca in tlahtlacol.

²⁶Oquitac ica ocachi mic ipatíu tláhyouis ipampa Cristo uan amo mopaquilismacas ica nochí tlen octentoya Egipto; pues occhiaya in mouistic tlahtlaul tlen Dios oc-mactisquia.

²⁷Ica in tlaniltoquilis, Moisés oquis de Egipto uan amo oquixmouilih nicualanilis in Faraón, pues omotlachicauilihtoya nic quemeh oquitztoya naquin amo uili sec-motilihtzinoua.

²⁸Ica in tlaniltoquilis, Moisés ocpeualtih in pascuahiluitl uan oquinnauatih in israelitas machahuichican nincalten ica istli, ohcon naquin oquinmictisquia nintlayacayoconeuan in egipcios amotlen maquinchiuili nintlayacayoconeuan israelitas.^d

²⁹Ica in tlaniltoquilis, in israelitas opanauhqueh in Mar tlen itoocaa Chichiltic quemeh oisquia campa tlauaquí. Uan ihcuac in Egipcios ocniquiah ohcon panosqueh, oma-ihsauihqueh.

³⁰Ica in tlaniltoquilis ouitz in ueyi tipamítl tlen ocyaualohtoya in altipetl Jericó, ihcuac in israelitas yocyaualohcah chicome tonal.

³¹Ica in tlaniltoquilis, in Rahab, naquin omonamacaya, amo omic inuan naquin amo tlatlacamatinih,^e pues yeh ica yec oquinsilih in israelitas naquin oquichtacatlataatoh nialtipeu.^f

³²¿Tlenoh ocachi uilis inquitos? Tlailiuis onuehcauasquia tla in-namechonnonotzas tlen oquichiu Gedeón,^g Barac,^h Sansón,ⁱ Jefeé,^j David, Samuel uan in teotlanauatanih.

³³Yehuan ica in tlaniltoquilis oquintlanqueh tlalmeh campa tlanauatiah cuahcual tiquiahqueh, occhiuqueh tlen yec itich nintiquiahcayo, uan ocsilihqueh tlen Dios oquimiluih quinmactis. Oquincamatzacuqueh leones,^k

³⁴oquinseuihqueh uehueyi tlimeh tlen oticuintoyah, ouili-queh ocholohqueh ihcuac ocniquiah quinmictisqueh ica espada. Naquin amo chicauaqueh ocahsiqueh chicualis, otlatlanqueh itich cuahcual ixnamiquilis, uan oquintotocaqueh soldados tlen opouiah itich ocsiqui tlalmeh.

³⁵Siquin siuameh oquinsilihqueh ocsipa yoltoqueh ninmiqueuan.

Ocsiquin oquintlahyouthiqueh, nic amo ocniqueh iccauasqueh Dios uan ohcon mopaleisqueh. Yehyeh omocauqueh maquinmictican nic ocniqueh icpiasqueh in yancuicayolilistli.^l

³⁶Siquin inca ouitzcaqueh, oquintacapitzohqueh, uan oquim-

^c Éx. 2:10-12 ^d Éx. 12:21-30 ^e Jos. 6:22-25 ^f Jos. 2:1-21 ^g Jue. 6:11-8:32
^h Jue. 4:6-5:31 ⁱ Jue. 13:2-16:31 ^j Jue. 11:1-12:7 ^k Dn. 6:1-27
^l 1 R. 17:17-24; 2 R. 4:25-37

ihilpihqueh ica cadenas uan oquintzacuqueh.^m

³⁷Ocsiquin oquintimictihqueh,ⁿ oquintlahcotiqueh ica sierra, [oquintlatlataqueh max milauac tlaniltocah,] oquinmictihqueh ica espada. San nouiyan ochanchiutinimiah, otlaquemiah ica isalea ichcatl uan chivo, amitlah imaxca ocpiayah, otlahyouayah, tlenasaso oquinchiuilayah.

³⁸In talticpactlacameh dion amo ocnamiquia inuan chanchiuasqueh ninqueh cualmeh tocnian, tlen omonic ninintinimisqueh campa tlaauaquilistlah uan itich in tipeyoh, uan omotlaathtinimiah iihitic in tlacoyocten uan iihitic in cuevas.

³⁹Nochtin yehuan, masqui Dios oquinyolulitac nic otlaniltocaqueh, ayamo ocsilihqueh tlen Dios omoyectencau innauac.

⁴⁰Ohcon omochiu nic Dios techonpialihtoc itlah ocachi cuali, pues ocmoniquiltih, mayeh yehuan uan mayeh tehuan, sansican matsilican tlen Yehuatzin omoyectencauzinoh.

Mattlalicán in totlachialis inauactzinco Jesús

12 Uan ica non noiuqui tehuau, nic techyualohtoqueh quemeh mixtli miqueh tlen ica ninyolilis yocnextihqueh nintlaniltoquilis, mattlatiucan tlen techtzacuilia, sannoiuqui in tlah-tlacol tlen techihlpihtoc. Uan ohcon mattzicuinicán uan amo

matsiyauican itich in ohtli tlen oc itpiyah tlaixpan.

²In totlachialis mai itich Yehuatzin Jesús, naquin itich ualeua uan itich yec mahsi in totlaniltoquilis. Yehuatzin oconsilih in tlahyouil ihcuac ocsohsaqueh, uan amo oquixmouilih quen ocpihpinautihqueh, pues oquitztoya in paquilistli tlen satepan inauactzinco oehcosquia. Uan axan ya metzticah tlayecmapan campa molanauatilia Dios.

³Ixconilnamiquican quen Yehuatzin ocxicoh nochi tlen in tlah-tlacouanih tlenasaso occhiuilihqueh; tla ohcon nanconchiuah amo namonsiyauisqueh, yehyeh namonmoyolchicauasqueh.

⁴Porque namehuantzitzin, masqui nanquimontlaxicouilihtoqueh in tlah-tlacouanih naquin namechonixnamiquih, ayamo acah icxauanihtoc nieso ipampa non.

⁵¿Quenat yonanconilcauqueh in tlen Yehuatzin namechonnahnauatia queh namonipiluantzitzin itich in Teotlahtolamatl? Pues ihquin ihcuilihtoc:

Noconeu, ixyeccaqui ihcuac in toTecotzin mitzchicaucanotza.

Uan tlanah chicaucan nitlahtol tlen ica mitzyectlalia, amo ixmolalpancaua ica.

⁶Tlamilauca, in toTecotzin icchicaucanotza naquin ictlasohtla,

^m 1 R. 22:26-27; 2 Cr. 18:25-26; Jer. 20:2, 37:15, 38:6 ⁿ 2 Cr. 24:21

uan icltatzacuilitia nochi
naquin icsilia queh icone-
tzin.^o

⁷Ixconxicocan non tlahyouil tlen namechoualtitlanilia Dios, uan ohcon xonmoyectlalican. Non ictosniqui Dios namechonita queh iconeuantzitzin, pues amo catqui dion se conetl naquin nipapan amo icchicaucanotza.

⁸Pero tla Dios san ohcon namechoncaua, uan amo namechonchicaucanotza quemeh nochtin nipiluantzitzin quinchicaucanotza, ictosniqui oscican namonteconeuan, uan amo namonpouih iconeuantzitzin.

⁹Tlen milauac, in totahuan nican talticpactli otechchicaucanotzayah uan otquintlepanitayah. ¿Queutoc amo ocachi icnamiquis mattlacamatican Yehuatzin, in to-Tahtzin Dios naquin itich ualeua in toalma, uan ohcon itpiasqueh yolilistli?

¹⁰In totahuan otechchicaucanotzayah se quesqui tonal quemeh yehuan oquitayah cuali, pero Yehuatzin Dios techonchicaucanotza nic icniqui mai se cuali para tehuan, uan ohcon matican ityolchipauaqueh quemeh Yehuatzin yolchipaucatztintli.

¹¹Yeh milauac, tlen ica techyectlaliah tecocoh, uan ihcuac techchicaucanotzah amo itpaquih. Masqui ohcon, satepan, ihcuac yotpanoqueh uan yotcahxilihqueh tlenoh technextilia, itmotlaniliah

seuilstli itich in toyolo, uan technextilia quenih ityecnimisqueh.

Matyectlachixtocan amo yeh itmihcuaniah itcauah Dios

¹²Ica non, ocsipa ixquimonchicaucan namomauan tla sa uitzih, uan namocxiuan tla sa cuitlauih,
¹³uan xonyacan itich in ohtli tlen milauac, uan ohcon naquin coxo amo mamoxonicuilo, yeh mapahti.

¹⁴Xonmoyecuicacan inuan nochtin, uan xonmosicantlalican ixconcauacan in tlahtlacol, pues tla acah amo mosicantlalia iccaua in tlahtlacol, amo uilis icmotilis in toTecotzin Dios.

¹⁵Xonmosepanitacan amo yeh acah mosicantlalia iccaua niteicnoitalitzin Dios, uan amo yeh acah mocuipa quemeh se niluatl chichic tlen quinchichilis nocsiquin.

¹⁶Amacah pitzotic maaxtinimi ica nitlalnacayo, uan amacah maquita queh amitlah ipatiu tlen itetlaocolil Dios, quemeh oquichiu in Esaú, tlen san ica tzocotzin tlacual ocnamacac in tlateochiualis tlen iyohca oisquia quemeh tlayacayotl.^p

¹⁷Ya nanconmatih, masqui in Esaú satepan ocniquia icsilis in tlateochiualis, amo ocsilih; uan acmo ouilic ocyelectlalih tlen yocchiuca, masqui ochocac ocniquia icpias.^q

¹⁸Namehuantzitzin amo onamonmotoquihqueh quemeh in Israelitas omotoquihqueh ina-

^o Job 5:17; Pr. 3:11-12 ^p Gn. 25:29-34 ^q Gn. 27:30-40

uac in tipetl Sinaí, tlen ouilia sec-machilia uan oxotlatoya ica tlitl, tlen otlayouatoya ica mixtli uan ocatca tlayouacatlah uan chicauac oehecaya,

¹⁹campa omocac in trompeta uan omocac in tlahtol tlen Dios oquim-iluaya. Uan naquin occaqueh, omotlatlautayah acmo ocniquiah iccaquisqueh nitlahtol,^r

²⁰nic amo ocxicouayah tlen oquinnauataya: “Tla acah, masqui se tlahpial, ictlacsá in tipetl, ixmictican ica titl [noso ica lanza].”^s

²¹Uan simi tlailiuis temohtih quen omotaya, hasta Moisés oquihtoh: “¡Inmomohtia uan in-uuiyoca!”^t

²²Tla yeh, namehuantzitzin onamonmotoquihqueh inauac in tipetl Sión, inauac nichantzín Dios naquin meuiltihcá, masequihto yen Jerusalén tlen catqui iluicac, campa tlailiuis cateh miqueh iiluicactlatitlancauan Dios,

²³campa monichicouah naquin nintoocaa ihcuiliutoc iluicac, naquin Dios achtoh oquinnotz maican iconeuantzitzin. Onamonmotoquihqueh inauac in Dios naquin icmihtaluis tlenoh icnamiqui sehse, uan innauac naquin oyah yec ninchiualis naquin ya cateh inauactzinco Dios naquin Yehuatzin mahsic yoquinyectlahih;

²⁴uan onamonmotoquihqueh inauactzinco Jesús naquin otech-

yectlahih iuan Dios itich in yancuic tlahtolsintilil, uan inauac niesotzin tlen oconxauanih, tlen ocachi mouistic tlahtoua uan amo nieso in Abel tlen ictlah-tlani tlatzacuiltlis.

²⁵Cuali ixconitacan, amo yeh nanconsicantlaliah Yehuatzin naquin techonnotza. Pues tla in israelitas amo ouiliqueh occholuiliqueh in tlatzacuiltl ihcuac ocsicantlahiqueh naquin oquinchicaucanotz nican talticpactli,^u tehuan sannoiuqui ocachi amo uilis itcholosqueh tla itsicantlaliah Dios naquin desde in iluicac techonchicaucanotzticah.

²⁶Ihcuacón itich nonqueh tonalmeh, nitlahtoltzin chicauac ocoholinih in talticpactli. Pero axan ihquin motencautzinoua: “Ocsipa incoholinis chicauac acmo sa yeh in talticpac, tla yeh noiuqui iuan iluicac.”^v

²⁷Nin tlahtol “ocsipa”, technextilia Dios quihcuanis tlen ocmochiulih uan uili olini, uan ohcon mocauas sa tlen amo uili oholini uan amo yacatlami.

²⁸Ica non tehuan, naquin itsiliah se tiquiahcayotl tlen amo poui nican talticpactli uan tlen amo oholini, matmotlasohcamatican, uan ohcon mattiquitilican Dios. Matpaquilismacacan uan matlamouilican inauactzinco, uan matpialican tetlacachialistli.

²⁹Ixconmatican, Dios yeh quemeh titl tlatlahtlamia.^w

^r Éx. 19:16-22; 20:18-21; Dt. 4:11-12; 5:22-27
^v Hag. 2:6 ^w Dt. 4:24

^s Éx. 19:12-13 ^t Dt. 9:19 ^u Éx. 20:19

Quenih chipaucaninimisquēh
in tlaniltocanih

13 Amo ixconcauacan namonmosepantlasoh-tlasquēh quemēh icnimeh.

²Amo ixconilcauacan nanquimonyecsilisquēh in motepaluanih, pues ohcon siqui oquinchansilishquēh iluicactlatitlanten masqui amo ocmatiah.^x

³Ixquimonilnamiquican naquin tzacutoquēh, quemēh oisquia namehuantzitzin iuan namontzacutoquēh. Ixquimonilnamiquican naquin simi quintlahyouiltihtoquēh, quemēh oisquia yeh namotlalnacayo tlen tlahyouihtoc.

⁴Itnochtin matmouisticmatican in namiccayotl, uan amo ixconsoquinilocan ica namonmocalaquisquēh iuan ocse naquin amo iuan namonnamiquehquēh. Ixconmatican, naquin pitzotic axtinimi ica nitlalnacayo, noso naquin mocalaquia iuan naquin amo iuan namiqueh, Dios iclatzacuiltis.

⁵Amo xonxihxicuintican nanconmoaxcatisquēh nochi, yeh xonpaquican ica tlen ya nanconpiah, pues Yehuatzin Dios ocmihlaluih: “Neh amo quemān incauas inmitzmatlanis, uan amo quemān inmitzcāuas mosel.”^y

⁶Ica non uilis ittōsquēh ica mic yolchicāualistli:

Yehuatzin in toTēcotzin nech-onmatlani,

uan amo inmouilis tlen uilis nechchiuilis in talticpac-tlacatl.^z

⁷Ixquimonilnamiquican namoteyacancauan naquin yonamech-onnonotzquēh nitlahtoltzin Dios. Ixconilnamiquican nochi tlen cuali omochiu ica ninyecninimilis, uan ixconniuilican nintlaniltoquilis.

⁸¡Jesucristo amo moyolpatlatzinoua, mayeh quen yalua, mayeh quen axan uan mayeh quen ica in sintitl nochipa!

⁹Amo xonmocauacan manamech-ontlaniltocican ica ocsiqui tensa uan san nenquen tlamachtilis. Pues moniqui seiyolo mamotlachicauli yehyeh itich nitetlasohitalitzin Dios, uan amo itich tlanauatil tlen tlahtoua de tlacual, uan amotlen quinmatlani naquin ictlacamatih.

¹⁰Omotemactih se tlatemactil topampa, tlen amo uilih ompa teuantih tlen tiqutitih itich in teopantli judío.

¹¹Pues in ueyiteopixcatlayacanqui icuica campa Tlailiuis Tlamouisticapantzinco nimeso siquin tlahpialten tlen ictemactia ipampa in tlahtlacol, uan nintlalnacayo nonquēh tlahpialten quinuicah quintlatitiueh quiyauac den altipetl.^a

¹²Ica non noiuqui Jesús omomiquilih quiyauac den altipetl, para ohcon quinsicantlalis in tocnian den tlahtlacol ica niesotzin.

¹³Matyacan yeh inauac, matquisacan tlatzalan den tocnian, uan

^x Gn. 18:1-8; 19:1-3 ^y Dt. 31:6; Jos. 1:5 ^z Sal. 118:6 ^a Lv. 16:27

quiyauac iuan matxicocan quen toca uitzcah.

¹⁴Porque nican amo itpiah se to-altipeu campa nochipa tisquéh, tlayeh itchiah in mouistic altipetl den iluicac tlen satepan isqui.

¹⁵Ica non nochipa matmactican Dios se tlatemactil de tetlacachiuallistli ica nitematlanilitzin Cristo, masequihto ica in tocamac matlacachiuacan Yehuatzin Dios.

¹⁶Amo ixconilcauacan nanconchiusquéh tlen cuali uan namonmosepanmatlanisquéh ica tlen nanconpiah, pues nochi non noiuqui quéh se tlatemactil tlen icuilita Dios.

¹⁷Ixquimontlacamatican naquin namechonyacantoquéh uan ixconchiuacan tlen namechonauatia, pues yehuan tlachixtoquéh quitztoquéh mayoli namoalma, uan yehuan naquin icteixpantisquéh inauactzinco Dios tlenoh occhiuquéh namonauac. Ixconchiuacan ohcon, tlayeh ohcon nanconchiuah, namechonitasquéh ica paquilis uan amo sa ica tlayexniquilis, porque non amotlen namechonmatlani.

¹⁸Ixtechontlatlautilican Dios. Tehuan amo cah itlah tlen techteiluia itich in totlayoluil, pues itniquih itchiusquéh nochi tlen cuali.

¹⁹Simi ixnechontlatlautilican Dios mauili mani ocsipa sanniman namouantzin.

Monauatia innauac uan quimilulia tlahtol de tlateochualis

²⁰Uan Dios, naquin contemactia seuilistli, naquin ocyancuicayolitih in toTecotzin Jesús itich miquilistli, naquin toUeyitepixcatzin uan quinyecpia nichcatzitzin, naquin ica niesotzin touan omoyectencau ica in sintitl nochipa,

²¹Yehuatzin manamechonyectlali para ixconchiuacan nochicuali chualis, uan ohcon ixconchiuacan nitlaniquilitzin. Uan Dios macmochiuihtzino totich nipaquilitzin, ica nichicualitzin Jesucristo. Yehuatzin itichtzin mapoui in mouistic uehcapan-tlalilis ica in sintitl nochipa. Amén.

²²Innamechontlatlautia, nocnuantzitzin, ixconyolxicocan nin tlahtol tlen ica innamechonah-nauatia; pues san tzocotzin tlen innamechonihcuilulia.

²³Ixconmatican nic in tocnitzin Timoteo acmo tzacutoc. Tlayeh uitz sanniman, neh iuan innamechontlati.

²⁴Ixnechimontlahpaluilican nochtin naquin namechonyacantoquéh uan nochtin niacatzitzin Yehuatzin. Namechontlahpaluah in tocnivan tlaniltocanih tlen pouih Italia.

²⁵Nitelasohitalitzin in toTahtzin Dios mai iuan nochtin namehuan-tzitzin. [Amén.]